



Tráth 4: Teaghlaigh na Lúcháire

Acmhainní don Tionól

'Bíodh croí oscailte creidmheach agat. Is le Dia an chuid eile a dhéanamh.'

(An Pápa Proinsias, éisteacht ghinearálta, Cearnóg Pheadair, 29 Márta 2017)

Áit Urnaí

Grianghraif lán de lúcháir a bhaineann le saol teaghlaigh na foirne agus na ndaltaí.

Cuirfead ar taispeáint san Áit Urnaí iad, agus ar PowerPoint chomh maith.

Ceol oiriúnach nuair a bhíonn na daltaí ag cruinniú isteach, agus na grianghraif á taispeáint.

Ceannaire: *Seasann cách agus cantar an t-amhrán tosaigh. Le linn an amhráin tugann na daltaí an choinneal agus an Bíobla isteach sa spás beannaithe.*

Amhrán Tosaigh:

'Amhrán an Chruthaithe', *I nGrá Dé*, N Shóisearacha/P1, l. 263.

Fáiltiú:

Lasaimid coinneal na Cásca le meabhrú dúinn go bhfuil Dia inár measc.

Tráth ciúin.

Cruinnimid lena chéile inniu mar phobal na scoile le ceiliúradh a dhéanamh ar an lúcháir a bhaineann le bheith páirteach lena chéile sa teaghlach baile, ár muintir mhuirneach féin, agus le guí a dhéanamh ar son na ndaoine is ansa linn. Ciallaíonn an focal 'lúcháir', ríméad a bheith ort as an rud ceart a dhéanamh. Tugann na grianghraif seo (taispeáin cuid acu a thugann léargas ar an lúcháir theaghlaigh baile) léargas ar imeachtaí lúcháireacha éagsúla a roinneamar lenár muintir, agus ar an ríméad agus ar an sonas a mhothaíomar mar chuid den teaghlach sa bhaile.

Déanaimis an grá a léiríonn Dia dúinn a cheiliúradh agus an grá a léirímid dá chéile chomh maith.

Paidir Thosaigh: Paidir Oifigiúil Chruinniú Domhanda na dTeaghlach

Deasghnáth an Chruinnithe:

Bíodh ceithre choinneal neamh-lasta sa spás beannaithe. Cuir an choinneal Chásca (nó coinneal thoirtíúil eile) in áit shuntasach, lasfar na ceithre choinneal eile ón gceann seo.

Dalta: Cuirimid fáilte roimh chách a tháinig chun an tionól urnaí seo a roinnt linn. Cruinnimid lena chéile le buíochas a ghabháil le Dia.

Ofráilimid solas an dóchais. Go mbeidh an solas seo ag lonnú in bhur gcroí, agus go roinnfidh sibh grá Dé lena chéile i ngach aon fhocal a deirtear agus i ngach aon ghníomh a dhéantar.

Baineann dalta úsáid as fáideog leis an gcéad choinneal a lasadh ó choinneal na Cásca.



Siblíni/Col Ceathracha: Ofráilimid solas an ghrá. Beir solas an ghrá leat pé áit ina mbíonn tú, agus cuimhnigh air go mbeidh solas lasta i gcónaí romhat sa bhaile.

Lasann siblín/col ceathrar an dara choinneal ó choinneal na Cásca.

Ball Foirne: Ofráilimid solas na lúcháire. Beir solas na lúcháire leat i measc do chairde agus do ghaolta, agus tú ag obair nó ag imirt nó ag freastal ar an duine eile.

Lasann ball foirne an tríú choinneal ó choinneal na Cásca.

Paróisteach/Comharsa: Ofráilimid solas an chreidimh. Beir solas an chreidimh leat ar fud an tsaoil, agus bí sásta a bheith mar bhall den phobal Críostaí agus mar lóchrann do chách.

Lasann paróisteach/comharsa, an ceathrú choinneal ó choinneal na Cásca.

Machnamh Aithrí:

Don uair ar theipeamar ar a chéile i bhfocal nó i ngníomh.

Tabhair maithiúnas dúinn a Thiarna.

Tabhair maithiúnas dúinn a Thiarna.

Don uair ar imíomar ar seachrán ó bhealach cheart grámhar maiteach Dé.

Tabhair maithiúnas dúinn a Chríost.

Tabhair maithiúnas dúinn a Chríost.

Don uair ar thugamar neamhaird ar láithreach Dé inár saol.

Tabhair maithiúnas dúinn a Thiarna.

Tabhair maithiúnas dúinn a Thiarna.

Scriptúr:

Sliocht ón Soiscéal Naofa de réir Lúcáis (1:39–45)

Glóir Duit a Thiarna.

Chuir Muire chun bóthair sna laethanta sin agus d'ímigh go deifreach faoi dhéin na gcnoc go dtí cathair in Iúdá, agus chuaigh isteach i dteach Zachairias agus bheannaigh d'Eiliosaibeit. Agus tharla, nuair a chuala Eiliosaibeit beannachadh Mhuire, gur bhíog an naionán ina broinn, agus líonadh Eiliosaibeit den Spiorad Naomh, agus d'éigh sí de ghlór ard agus dúirt: 'Is beannaithe tú idir mná, agus is beannaithe toradh do bhroinne. Agus conas a tharla seo domsa, máthair mo Thiarna a theacht chugam? Óir féach, nuair a chuaigh glór do bheannachtha i mo chluasa, bhíog an naionán i mo bhroinn le háthas. Agus is méanar di seo a chreid go gcomhlíonfaí na nithe a dúradh léi ón Tiarna.'

Soiscéal an Tiarna.

Moladh duit a Thiarna Íosa Críost.



Guí an Phobail:

Ceannaire: Cruinnimid go grámhar lena chéile, mar dheartháireacha agus mar dheirfiúracha i gCríost. Iarraimis ar ár nAthair grámhar éisteacht lenár nguí.

Is é an freagra ná: *Líon le do lúcháir sinn.*

1. Guímis ar son pháistí agus teaghlaigh an domhain.
Táimid buíoch den mhuintir ionúin agus den am luachmhar a chaithimid lena chéile. Go mbeidh an lúcháir go smior i gcónaí ionainn.
A Dhia Ghrámhar: *Líon le do lúcháir sinn.*
2. Guímis ar son bhuanna an Chruthaithe: Gabhaimid buíochas le Dia as an uile neach beo. Táimid tiomanta d'aire a thabhairt don saol agus don chomhshaol.
A Dhia Ghrámhar: *Líon le do lúcháir sinn.*
3. Guímis ar son na gcúramóirí a thugann aire do na heasláin. Gabhaimid buíochas as na scileanna atá acu, agus as an ngrá a bhronnann siad orainn in am na breoiteachta.
A Dhia Ghrámhar: *Líon le do lúcháir sinn.*
4. Guímis ar son na ndaoine aonaránacha nach bhfuil dóchas ar bith iontu. Déanaimis ár ngrá agus ár gcairdeas a bhronnadh orthu, agus roinnimis an lúcháir agus an dóchas atá ionainne leo.
Iarraimid ar Dhia go mbeidh an neart againn an lámh chúnata a shíneadh chuig an duine gátarach.
A Dhia Ghrámhar: *Líon le do lúcháir sinn.*
5. Gabhaimid buíochas as na daoine atá ar dheasláimh Dé. Táimid buíoch d'Íosa, a fuair bás agus a d'aiséirigh ionas go mbeadh saol taitneamhach síoraí ina fhochair ar Neamh againn.
A Dhia Ghrámhar: *Líon le do lúcháir sinn.*

Ceannaire: Tuigimid go maith go dtugann ár nAthair ar Neamh cluas le héisteacht dúinn. Déanaimis ár nguí pearsanta féin a chur go ciúin chuige.

Tráth ciúin.

A Athair ghrámhar, líonann tú ár saol ar domhan le haoibhneas do lúcháir. Deonaigh go roinnfimid do ghrásta go fial ar chách, ionas go ndéanfar an domhan álainn seo a líonadh le sonas do ghrá. Iarraimid é seo ort trí Chríost ár dTiarna do Mhac. *Amen.*

Urnaí:

Rinneadh Máthair Dé de Mhuire nuair a ghlac sí leis an gcuireadh ó Dhia. Glaoimid ar Mhuire, Máthair na Trócaire, Máthair an Dóchais, agus guímid lena chéile: *'Sé do Bheatha a Mhuire ...*

Paidir Dheiridh:

A Thiarna Íosa Críost,

Molaimid tú agus gabhaimid buíochas leat as na tuismitheoirí, as na deartháireacha agus na deirfiúracha ionúine a bhronn tú orainn. Tabhair aire ghrámhar dóibh i gcónaí.

Tabhair spreagadh dúinn aire ghrámhar a thabhairt dá chéile, agus freastal ar a chéile trí chabhair do ghrá.

Iarraimid ort aire a thabhairt dóibh.

Is mó agus is treise do ghrá dóibh ná ár ngrá féin.

Bímis dlúth grámhar lena chéile anseo ar domhan agus aontaigh lena chéile sinn arís ar Neamh.

Moladh go síoraí le Dia na glóire.

Amen.

Amhrán: 'Aoibhneas an Ghrá don Domhan Uile'